



En regurdientscha da **Faustin Cavegn, Rueras**

Sco quart affon dils geniturs Tina e Maurus Cavegn-Monn ei Faustin naschius, ils 18 da matg 1964 a Rueras.

El era in pop spir energia. La mumma aveva tutta breigia da dumignar il buob plein veta. La famiglia veva aunc sper il Faustin ils affons Alexander, Arthur e l'Ervinina dad educar. Il puresser che deva il da viver pretendeva era bia engaschi.

Il fevver 1967 ha il Faustin giu il Krupp ed ei, entras ina munconza dad oxigen, vegnius impediuis. Per ils geniturs, surtut per la mumma ch'era en speranza, ei quei stau ina gronda frida. La famiglia ha lu aunc giu il disclieg da piarder la sora pintga, ch'ei naschida il zercladur. In di suenter la naschientscha ei la poppa Rita morta.

Bia forza ha quella situaziun duvrau dalla giuvna famiglia. Il Faustin ei igl empren temps da sia malsogna staus liung temps per spitals entuorn. Suenter quei temps ha el anflau in dacasa ella Casa Soldanella. Beinsavens era el era a casa tier ils ses. El ha era, malgrad, ni forza gest muort siu impediment, dau bia legria e carezia als ses. El sedustava bravamein encunter sia malsogna.

Tochen 18 onns ha el astgau guder bia carezia e bien quitau ella Casa Soldanella. Da gliez temps er'ei aschia ch'ils affons bandunavan la Soldanella cura ch'els vevan cumplenu 16 onns. Per Faustin ei quei temps vegnius prolunghius. Cun 18 onns ha ei buca mo giu num per el da bandunar siu dacasa, mobein era sia famiglia e quei suenter ch'el aveva avon mo in onn piars sia mumma Tina entras in fetg tragic accident. Quei ei stau per el ina sperdita che negin ha saviu remplazzar. Mo siat onns pli tard ei era il bab Maurus, ch'era vegnius grev malsaus, morts.

Ins ha anflau in niev dacasa ella Casa Scalottas a Scharans. Il Faustin ei staus leu ca. 10 onns. El ha astgau viver en in bien ambient cun bia buns carstgauns che han giu quitau dad el. Denter quels sudeva era il Pader Silvio che prendeva peda e veva bien contact cun il Faustin.

Pli tard han ils responsabels dalla Casa Soldanella midau igl intent da viver e recepiu glied carschida cun impediments enstagl dad affons. El ei puspei returnaus cun grond plascher en siu vegl dacasa, ha denton stuiu s'endisar vid il romontsch, demai ch'el ha onns ora plidau buna-mein mo tudestg. Nus, sco famiglia essan selegrai fetg ch'il Faustin era puspei pli datier da nus.

Duront sia veta ha Faustin adina puspei stuiu semudergiar cun, per part fetg fermas attaccas d'epilepsia. Tier mintga attacca ein cellas dil tschurvi vegnidas disfatgas. Quei ha cul temps caschunau ina digren dalla motorica e dil lungatg. Ils davos onns ha la malsogna duvrau dad el tuttas energias. Las forzas han schau suenter pli e pli fetg, il tgierp ha rebelluu. Quei ei forsa era stau il motiv, daco che Faustin sevilava per temps mordio e scheva tudi mo «nou,nou». Dils pertuccai en Casa Soldanella ha quei pretendiu massa pazienza, perseveronza e carezia.

La davosa jamna, suenter in per dis spital eis el turnaus la sonda en Casa Soldanella. La dumengia sera ha el bandunau nus, quei tuttina nunspitgadamein. Nus essan trests, mo era engrazieivels che Faustin ei liberaus ussa da tut mal ed astga guder la legria perpetna.

Per la buna tgira e bien quitau, sco era per la gronda carezia che Faustin ha astgau retscheiver duront sia veta, engraziein nus da cor.

Magari aud'ins: Tgei ei quei per ina veta? Ni: Faustin ha nuot dalla veta

Viver e murir ein savens fetg datier in da l'auter. Quei vein nus era saviu far persenn tier Faustin. Pliras gadas ei sia veta pendida mo vid in fil. Il fatg, che Faustin ei vivius vinavon ha perquei giu in senn, malgrad il ferm impediment.

Nus familias vein astgau guder bia bials muments cun Faustin. Tier las visetas che nus vein fatg cun nos affons han els empriu che impedi-

ments, seigi quei corporals ni spirtals, ein ina part da nossa societad e ch'ins sto cuvierer vi nuotzun. Quei han era ils geniturs da Faustin fatg. Els han investau fetg bia carezia e temps el mintgadi da Faustin ed han mai zuppentau vi siu impediment.

Faustin saveva far risadas cun piculezzas. El reagava magari sin ina construcziun ch'ins scheva, cun rir, ch'el tut sezuccadeva. El ha schau vegnir nus adina puspei pertscharts, ch'ei secapescha buca da sesez ch'ins ei sauns, e che nus duessen magari esser pli engrazievels per tut quei bien che nus vein.

Demai che Faustin veseva nuot, era el sensibilisau tut special entras sia uvida. El enconuscheva las personas che s'avischinavan ad el entras ils pass. Sin quei ch'el udeva reagava el savens cun in surrir. Lu savevan nus ch'ei mondi bein cun el, lu veva el buna luna. El enconuscheva e differenziava las personas cun udir la vusch. Faustin tedlava fetg bugen canzuns era accumpignadas dad ina ghitarra ni in auter instrument. Ei deva canzuns nua che ses egl's tarlichavan cura ch'el udeva ellas, p.ex. tier clara notg, ni «zoga am boga» ni «ds oug vom Chönigsadler» da Peter Räber. Quei di che Faustin ha stuiu ir en spital ha il Hanspeter observau el spieghel co el ha ris udend ina canzun enconuschenta ord il radio.

Pli baul, cu nos affons eran pigns paterlava Faustin aunc pli bia. Cun gidar suenter in techet saveva el dir tgei affons che seigien gest sin viseta e tier tgei famiglia ch'ils affons s'audien.

Savens vein nus entupau Faustin cuntents. Quei ha fatg surstar nus bia gadas e nus essan vegni pertscharts, che la cuntentientscha ei ina custeivladad preziosa e che nus aschi numnai sauns carstgauns savessen emprender ina massa dils carstgauns cun impediments. Sch'el veva buca aschi bien, lu scheva el era sentir ei. Ei ha dau temps, nua ch'ei mava buca aschi bein cun Faustin (specialmein ils davos onns). Lu sevilava el savens e scheva tudi mo nou, nou. Tgisa, tgei che mudergiava el? El saveva deplorablamein buca comunicar siu malessen a nus cun plaid. Sia mimica tradeva denton ei.

Plascheva enzatgei buca a Faustin, sentev'ins quei ualti spert. Lu sevilava el numnadamein mordio. El saveva exact tgei ch'el leva, respectiv tgei ch'el veva buca bugen. Ei ha dau fasas, nua ch'el leva dispet buca

ir a spass. Bein enqualgadas ha el fatg encunter aschi fetg ch'el fuss bunamein daus ord la suppia da rodas. Da fina bial'aura scheva el, jeu mon buca giuadora, oz plov'ei ed igl ei freid (da mesa stad). Ins astgava mai dumandar Faustin, has pulit. Sia risposta era numnadamein na betga pulit, bien.

Duront il temps che Faustin saveva aunc magliar e laguoter meglier la spisa e bubronda survegneva el da marena ina scadiola caffè. Quei veva el aschi bugen, ch'ei fuss buca stau bien, sch'el vess stuiu desister da quella bubronda.

Denter ils cussadents impedi dat ei era mintgaton cudizzems. Gliez pudeva Faustin buca star ora ed ins stueva metter el enzanua tut persuls. Fetg bugen era Faustin en stiva dalla Casa Soldanella. Il pli grond plascher haveva el denton, cura ch'el astgava ir en siu letg. Leu vegneva el cavigliaus sco in retg ed il surrir sin sia fatscha tradeva sia cunten-tientscha.

Faustin era avisaus cumpleinamein sigl agid dil persunal da tgira. Quei ha segir e franc duvrau massa pazienza da sia vart, sco era dils conluvrers en Casa Soldanella.

Nus essan fetg engrazieivels al Faustin per tut quels bials e custeivels muments che nus havein astgau passentar cun el. Faustin ha dau a nus confamiliars emoziunalmein fetg bia, probabel dapli che quei che nus vein saviu porscher ad el. Siu rir da cor mantenin nus en nos cors. Nus schein encrescher per el, per siu esser aschi natural.

Nus vegnin a seregurdar en carezia dil Faustin.